

南
漣
桔
語

南齊楷語卷之三

江都蔣超伯輯

古以荀孟並稱

漢書藝文志孟子十一篇孫卿子三十三篇以荀次孟其曰
孫卿子者緣漢宣帝諱改荀爲孫也至楊倞爲注更名之曰
荀子考劉向序錄卿以齊宣王時來游稷下後仕楚春申君
死而卿廢史記六國年表春申君之死上距宣王之末凡八
十七年史記稱卿年五十始游齊則春申死時卿年一百三
十餘矣于理恐未必然晁公武讀書志謂史記年五十爲年
十五之訛卽如公武言卿亦百餘歲人矣其性惡篇曰枸木
必待礪括烝矯然後直鈍金必待礪礪然後利今人之性惡
必將待師法然後正得禮義然後治今人無師法則偏險而

不正無禮義則悖亂而不治古者聖王以人之性惡是以爲之起禮義制法度以矯飾人之情性而正之以擾化人之情性而道之使皆出于治合于道云云大指與魯論道德齊禮之意相合其善者僞也之僞訓爲人爲楊倞注意甚明近世劉端臨先生補注于儒效篇其衣冠行僞句云台拱案荀子書言僞者義皆作爲其于荀子全書可謂渙然冰釋矣後儒闇于訓詁以爲作僞之僞遂詆卿爲偏駁冤哉至其非十二子一篇俗儒藉口無論子思孟子與卿先後同時猶之朱陸詆謀不足深訝况韓詩外傳所引祇非十子而已並無子思及孟子也王應麟定爲李斯等羣人讀書得間矣總之荀子淵源出于孔氏尤有功于諸經謝夷吾薦王充疏云前世孟軻孫卿近漢楊雄劉向司馬遷不能過也亦孟荀並舉是去

孟子不過一間卽以孟子言之陸德明經典釋文三十卷自
周易以至老莊爾雅皆有釋文獨遺孟子且有議其書類乎
呂覽者矣有駁益避箕山之說爲無稽者矣明人賀祥史取之說馮休
刪孟晁說之詆孟鄭厚叔藝圃折衷尤以排斥孟子爲事豈
獨荀子一書被人指摘哉漢書酈食其傳爲里監門然吏縣中賢豪不敢役王懷祖曰吏然二字誤倒史記吏字在然字上以此例之則年五十爲倒字可無疑議矣

孟子逸文

孟子逸文散見于經史者舜生五十不失其赤子之心見康
成坊記注堯舜之道非遠人也而人不思之耳見桓寬論人
皆知糞其田而不知糞其心見說苑三見齊王而不言事見
荀子堯舜不勝其美桀紂不勝其惡見史記又按後漢書郅
憚傳憚曰孟軻以彊其君之所不能爲忠量其君之所不能

爲賊今孟子無此語亦逸文也

莊子逸文

藝文類聚第九十卷引莊子逸文云老子見孔子從弟子五人問曰前爲誰對曰子路爲勇其次子貢爲智曾子爲孝顏回爲仁子張爲武老子嘆曰吾聞南方有鳥其名爲鳳所居積石千里天爲生食其樹名瓊枝高百仞以璆琳琅玕爲實天又爲生離珠一人三頭遞臥遞起以伺琅玕鳳鳥之文戴聖嬰仁右智左賢云云太平御覽所引亦同郭璞注山海經亦節引之而衍與玕琪子四字子張爲武世罕知者爲錄出之

官寺

漢魏皆臺寺連言內而門下省外而州縣統稱爲寺

門下省曰侍中

寺見後漢書靈帝紀尹賞傳便與今宗人府古宗正寺也欽
出瘞寺門桓東則令署亦稱寺也
天監古天文寺也鑾儀衛古虎賁寺也戶部古司農寺也工
部古將作寺也國子監古國子寺也詹事府古率更寺也家
令率更太僕並稱三寺儀曹一稱禮寺大理寺或改稱祥刑
寺焉唐龍朔中事漢時雖遠在蠻方均稱府寺後漢書南蠻傳和
帝永元十二年夏四月日南象林蠻夷二千餘人寇掠百姓
燔燒官寺是也官舍皆稱寺舍楊厚傳注引袁山松書曰楊
統在縣休徵時序風雨得節嘉禾生于寺舍

太微經等書

自揚子草元紛紛鑿效北周衛元嵩撰元包五卷其體例略
近太元以太元義本連山元包遂襲歸藏首坤而次乾詰屈
其詞加之僻字術家從無用以占卜者然其人則列北史藝

術傳矣有參兩者不知作者爲誰似仿太元元包益加詭異
其中曰卑者猶易之有爻元之有測也曰謫者猶易之有象
元之有贊也又有太微經者明太僕少卿文翔鳳撰分四經
十二贊十六圖六十四緯四表一曰昱經以律天道二曰麗
經以律王道三曰堯經以律聖道四曰顓經以律神道詞極
支離潛虛差勝亦不盡出溫公之手今世所行朱子所謂泉
州本也

六帖

香山作六帖孔傳又續六帖以繼之楊伯巖又作六帖補以
繼之要以白書爲鼻祖唐蘇冕撰九朝會要宣宗時敕崔鉉
等續之宋初王溥重輯之實非溥一人之力也

西銘

先是橫渠西牖書訂頑東牖書砭愚伊川曰是啓爭也乃改訂頑曰西銘砭愚曰東銘見近思錄

蔡茲

朱子十八舉于鄉考官蔡茲奇之曰此人三篇策皆欲爲朝廷措置大事它時必非常人見文公年譜

閻相畫

朱龍圖蔣璨

稱之奇猶子其跋懷素自敘稱之奇爲伯考少師也

跋閻右相畫蕭翼賺

蘭亭云老僧張顒失色有遺元珠之狀書生意氣揚揚有歸全璧之喜想見其畫之妙然翼事距立本甚近且關涉昭陵何敢公然圖繪此五季畫師僞作耳本朝乾隆中蔣文敏溥購得古本孔子弟子像五十九人進之中秘確爲右相筆也

尙書異文

班固地理志引禹貢多異文如鳥夷皮服海瀕廣瀉瑤瓊篠簜鳥夷卉服被盟豬至于倍尾又東至于醴四與旣宅宅如劉愷長吏行服議職在辯章百姓宣美風俗平辯古通也朱寵嵩山石闕銘九山甄旅甄栞古通也其堯典之文思安安漢儒均讀晏晏馮衍顯志賦思唐虞之晏晏今揖稷契與爲朋注尙書考靈曜曰放勛欽明文塞晏晏范書鄧壽傳何敞疏曰誠不欲聖朝行誹謗之誅以傷塞晏之化注引康成尙書考靈曜注曰道德純備謂之塞寬容覆載謂之晏今盤庚篇云今予其敷心腹腎腸乃大謨也當作今予其敷心優賢揚厯見文選魏都賦注下句厯字當屬上讀此外六經古義與今異讀者如吳志陸績傳注魏志劉靖傳晉書劉宏傳皆以舉善而教爲句東觀記序論章帝云書云孝于惟孝友于

兄弟聖之至要也包咸論語注孝于惟孝者美孝之詞也友于兄弟善於兄弟也潘岳閒居賦亦然唐王利貞易州石浮圖頌亦然但于作乎耳利貞詞云孝乎惟孝忠爲令德若曾子固讀朔南暨聲教爲句則不知何本耳

錢唐有丁傳者著魯齋述得辨之

蹇驚

枚乘兔園賦若乃附巢蹇驚之傳于列樹也章樵注附巢蹇驚皆水鳥鷗鷺之屬

戎昭

陳世官名有戎昭將軍果毅將軍顏師古匡謬正俗駁之曰左傳戎昭果毅克敵爲果致果爲毅此言理戎之體須明果毅譬易稱師出以律豈可便稱師出將軍乎

匡謬正俗非完書師古空時彙

草才半部帙未終見其子顏楊庭進匡謬正俗表

木棉

種棉之法以褚華譜爲最詳謝疊山有謝人惠木棉詩詩中言江東無木棉乃角齒不兼與之理則宋季三吳猶未植也據邱濬大學衍義補木棉至明世始徧布天下宋元間雖傳其種民間尙不多云

丁斐

東坡烏喙本海獒詩中有云盜肉雖小疵鞭箠當貰汝語有所本三國志裴注引魏略曰丁謐字彥靖父斐字文侯太祖嘗謂左右曰我之有斐如人家有盜狗而善捕鼠盜雖有小損而完我囊貯遂復裴官聽用如初

木禾

郭景純木禾贊崑崙之陽鴻鷺之阿爰有嘉穀號曰木禾匪

植匪藝自然靈播播讀平聲叶波

次山集序

李玉溪元次山文集後序略云其疾怒急擊快利勁果出行
萬里不見其敵高歌酣顏入飲于朝斷章摘句如娠始生狼
子狗孫競于跳走翦除斬殘程露血脈其詳緩柔潤壓抑趨
儒如以一國買人一笑如以萬世換人一朝重屋深宮但見
其脊牽絳長河不知其載其正聽嚴毅不滓不濁如坐正人
照彼佞者子從其翁婦從其姑豎麾爲門懸木爲牙張蓋乘
車屹不敢入將刑斷死帝不得赦其碎細分擘切截纖顚如
墜地碎若大咽餘鋸取朽蝨機蟒出毒刺眼楚齒不見可視
其總旨會源條綱正目若國大治若年大熟辨頭鑿齒扶服
臣僕融風彩露飄零委落邪人佞夫指之觸之薰薰熙熙不

識其故吁不得盡其極也世以玉溪獮祭工于駢儷豈知散行之奧隋一至此乎

樊川集序

裴延翰樊川集序云竊觀仲舅之文高騁魚鴈旁紹曲撫絜簡渾圓勁出橫貫滌濯滓窳支立欹倚呵摩駁瘕如火煦焉爬梳痛癢如水洗焉其抉剔挫偃敢斷果行若誓牧野前無有敵其正視嚴聽前衡後鑾如整冠裳祇謁宗廟其聒蟄爆聾迅發不慄若大呂勁鳴洪鐘橫撞撐裂噎暗憂切韶護其砭熨疾害隄障初終若濡橐于未焚膏癰于未穿栽培教化翻正治亂變醯養瘠堯醢舜薰斯有意趨賈馬劉班之藩牆者耶其餘述論讚誠興諷愁傷易格異狀機鍵雜發綿遠窮幽醲腴魁臯筆酣句健宛眇碎細包詩人之軌憲整揚馬之

衙陣聳曹劉之骨氣掇顏謝之物色然未始不掇斷治本經
幅道義鉤索于經史鉉禦于理化也延翰名不甚顯而文之
適拔如此

李朴評唐人云杜牧清深勁峻而體乏步驟謂牧文尚在劉夢得之下

口箴

姚梁公崇口箴曰君子欲訥吉人寡辭利口作戒長舌爲譏
斯言不善千里遠而勿謂可復駟馬難追惟謹惟默澄神之
極去甚去泰居物之外多言多失多事多害聲繁則淫音希
則大室本無暗垣亦有耳何言者天成蹊者李似不能言爲
世所尊言不出口冠時之首無搖爾舌以速爾咎無易爾言
亦孔之醜敬之慎之可大可久敬之伊何三命而走慎之伊
何三緘其口曷哉夫子行矣勉旃書之屋壁以代韋弦文子
微明篇有云無先人言後人而已附耳之語流聞千里較口

箴尤簡切也

又按傅鵠有口誠其詞云勿謂何有積怨致咎勿日不傳伏流成川蟻孔潰河流穴傾山亦

不如文子之醒快

枝

枝非美德乃顏魯公離堆記頌鮮于仲通云卓爾堅枝毅然

抗直

魯公蓋本後漢書桓嚴傳云每至京師未嘗舍宿楊氏其貞枝若此

醪即釋字

漢李翕析里橋郁閣銘醪散關之嶠漂徙朝陽之平慘醪即

釋字嶠漂即潮濕慘與燥同

漢碑之農夫醪未辭榮醪俱即釋字謂釋未釋微也逸周書

命訓解以紉絕當天之福以斧鉞當天之禍即微冤字也王會解天子南面立絕無繁露殷公夏公立焉皆南面貌有繁

露並冤字也

沆瀣

梁武帝時洗馬到沆字茂瀣

張平子思元賦喻青岑之玉醴兮餐沆瀣以爲糧沆瀣北方

夜半氣也出陵陽子明經見王逸詞注俗以爲露華者非

墜形

淮南墜形訓凡地形東西爲緯南北爲經山爲積德川爲積刑高者爲生下者爲死邱陵爲牡谿谷爲牝山氣多男澤氣多女障氣多暗風氣多聾林氣多癰木氣多偃岸下氣多腫谷氣多痺邱氣多狂等語卽千古地師之祖堪輿家以地脈之旺衰決人丁之多寡祿命之休咎疾痛之顛連大指悉本乎此

地理

四則

地理之說凡二宗一宗廟之法宋時王洙傳之今世習之者甚少一江西之法肇于贛人楊筠松其說主于形勢以龍穴沙水爲要至今學者師之筠松一稱楊救貧見宋史藝文志

相傳唐末人官至金紫光祿大夫黃巢亂後往來虔州所著

有撼龍經崙言山龍脈絡分貪狼巨門等九星子癸並甲申貪狼一路行

王卯乙未坤五位為巨門乾亥巽巳連戌武曲名酉辛丑

艮丙天星認破軍寅午庚丁上右弼四星臨廉貞歸五位諸

星順逆行詳疑龍經則上篇言枝幹中篇論尋龍下篇論結

穴附以疑龍十問又葬法倒杖一卷臚二十四沙葬法又天

玉經內傳三卷外篇一卷近潘公思架為箋崙言理氣曾文迪者筠

松之高弟著青囊奧語廖瑀者陳希夷弟子吳克誠再傳之徒九著

星穴法今地師培築劇削之法皆起于瑀賴布衣者名文俊嘗官于建陽自號布

衣子著催官篇二卷楊會廖賴是為地理家四大宗焉此外如朝鮮

鳩林大師道誥女因食巨瓜而有娠南唐之何溥撰靈城宋

之蔡牧堂及子元定牧堂有發微論元定病智元之劉秉忠撰

秉忠有明之劉青田撰披肝露膽經或疑筆架科名應有分

玉尺經滿床牙笏世為官語為太陋非出于基

侯皆稱巨眼並號大家上中下三元其說出于何溥以甲子
六十年爲一元配以洛書九宮厯上中下三元爲一周厯三
周五百四十年爲一運與皇極經世相仿佛豈邵子曾見其
書歟

明人李國木輯地理大全初集三十卷凡郭璞葬書唐邱延
翰天機素書楊筠松撼龍經等書並列焉而附以自撰之遜
庵彙古二集二十五卷凡曾文迪青囊序吳克誠天玉外傳
等書並列焉而附以自撰之索隱元宗專論繼理氣地理之學備
于是矣

此外如萬厯時羅珏地理總括黃慎堪輿類纂人天共寶徐
之鎔羅經頂門針沈昇羅經消納正宗蔣大鴻地理古鏡歌
梅自實定穴便覽等篇其論二十四山陰陽局勢及特生墩

阜翦水裁局俱有可採而葉泰山法全書大旨以楊吳二家
爲主其論巒頭理氣悉本筠松在諸家中尤爲翹楚若無名
氏之寸金穴法則妄謬不經矣

寸金穴法稱汀州王氏墓如真武跌坐形龜蛇俱備郭璞

定穴于龜眼又安一穴于蛇頭子孫富貴不絕可爲噴飯矣

陸氏埤雅引五姓秘要曰相山之法欲如生蛇之渡水欲如
斲木之飛翔又引葬書曰若龍若鸞或騫或盤又云小頓大
起宛轉如盤龍奮迅如舞鶴謂之佳岡今五姓秘要等書多
佚按虎鈴經有山勢一篇其文云山如盤龍旺案數重宛轉
斜曲首尾相從山如鳳凰翹翼開張羣隊十萬挾隴帶岡前
銜印綬後有回翔山如飛龍支翼遠通或驚或躍乍橫乍縱
山如母狗頭拳尾就腹內乳兒項上連首山如生蛇或曲或
斜後岡前合隱若藏車山如騏驎乍立乍蹲羣從數萬朝者

數人山如臥牛屈膝拳頭三光照覆兩水分流旁帶林隴依
附土邱山如伏鼃四方無缺清泉東流亢陽下歇三門起高
一戶雙闕山如游龍倚伏數重華蓋隱隱美草茸茸前如雀
躍後如雞籠剛柔順俯八卦皆通山如舞鶴翹翼仰搏開拓
胸臆首尾盤礴如此者皆可居也愚謂似此地形可以屯軍
可以圖墓勝與地師黃撥沙輩語也

空青

黃庭經惟待九轉八瓊丹注八瓊者朱砂雄黃空青琉黃雲
母戎鹽硝石雌黃按此八物中空青最不易得本草云空青
其腹中空能化銅鐵鉛錫作金庚辛玉冊云空青中空有水
如油治盲立効曾青形如黃連曾空二青皆寶物也又按淮
南子墜形訓黃埃五百歲生黃湏黃湏五百歲生黃金青曾

八百歲生青瀕青瀕八百歲生青金曾青卽青曾耶

碧玢

乾隆以來玉器中之翡翠碧璽二種爲尤貴金樓子碧璽似玉猗頓別之白骨似牙離婁別之碧璽豈卽碧璽類乎例文作碧霞璽而思補齋筆記作碧玢玢云

例文者謂兵律私越關津一條

琺瑯

琺瑯以明景泰年製爲最佳錢虞山餽王師禮單有琺瑯銀壺一具琺瑯鼎盃一對琺瑯鶴盃一對

洗

黃山谷詩碌碌盆盎中見此古罍洗按洗之爲器古矣山左金石志有漢永元鷺魚洗口徑七寸文震亨長物志述洗式尤多曰葵花洗磬口洗四捲荷葉洗捲口蔗段洗雙魚洗菊

花洗百折洗梅花洗方洗魚藻洗葵瓣洗鼓櫟洗凡十餘種

瓠瓠

爾雅之康瓠李巡本作光訓爲大瓠埤蒼作瓠字林作瓠

硯二則

伊墨卿先生守惠州以歸善奸民陳亞本事忤制府吉慶劾
戍軍臺後督臣倭什布平反之吉公自盡墨卿事旣白擢守
廣陵近得一硯上有先生銘云惟硯作田咸歌樂歲墨稼有
秋筆耕無稅字極奇古

端溪硯譜云端石外有黃鰓胞絡研
去方見硯材宋高宗云端研欲如一

段紫玉磨之無
聲不以眼爲貴

紀文達公第九十九硯銘云西洞殘石今或偶有其出雖新
其生已久譬溫太真居第二流之首

九客

沈括夢溪自誌琴棋禪墨丹茶吟談酒謂之九客

九曜石

九曜石本在廣東學使池中歐陽方伯借其一安藩署東齋上有藥洲二字旁書米黻元章題又有時仲公誦積中同游元祐丙寅季春初八日題十八字趙公慎畛作小團焦蓋之命之曰借石亭

米公獲硯帖

米南宮獲硯帖云僕今日獲天下奇硯石佳發墨眼大如錢今歲有此奇獲真丙辛天地合也蓋公以辛卯歲辛丑月生獲硯之年爲丙戌故云然也宋史米芾傳誤稱芾卒時年四十八而真跡流傳在四十八歲後者甚多惟張青父名丑號米庵考證爲詳云米公以皇祐三年辛卯生以大觀元年丁亥卒

年五十七足糾史誤茲硯獲于丙戌其年蓋五十六歲云丑因
得米公寶章待訪錄墨跡名其室曰寶米軒凡清河書畫舫
真跡日錄法書名畫見聞錄南陽法書表南陽名畫表清河
書畫表皆其所撰收藏之家多資以別真偽視朱存理之珊
瑚木難趙琦美之織網珊瑚郭若虛之圖畫見聞志汪珂玉
之珊瑚網孫承澤之庚子銷夏記高士奇之江村銷夏錄十
永譽之式古堂書畫彙考倪濤六藝之一錄皆過之而無不
及丑初名謙德瓶花譜乃其少作故題曰張謙德編

韻趣

書畫皆以韻爲貴山谷云美而病韻者王著勁而病韻者周
越皆渠儂胸次之罪也病韻謂少韻也唐志契云作畫以氣
韻爲本讀書爲先紀文達公以爲確論南田云瀟灑風流謂之韻盡
變窮奇謂之趣有韻有趣斯謂之筆墨皆本山谷語耳

論畫

十則

帝王工繪事者魏則高貴鄉公曹髦畫史列其新豐放雞犬

圖二疏圖黃河圖盜跖圖凡四卷晉則明帝畫史列其史記
烈士圖息徒蘭圃圖洛神賦圖穆天子宴瑤池圖漢武同中
圖畋游圖瀛洲神仙圖雒川風土圖凡八卷梁則元帝畫史
列其文殊像一卷游秦苑圖二卷芙蓉湖醮鼎圖一卷鹿圖
一卷鸛鶴弄陂澤圖一卷共六卷李嗣真畫品列髦於下品
之上晉明梁元並下品之中此後則宋宣和明宣德俱極精
能並臻絕詣矣

嵇叔夜亦畫中高手裴孝源公私畫史稱康有師子擊象圖
巢由洗耳圖李嗣真續畫品下品上凡四人爲高貴鄉公毛

惠秀史彙暨叔夜也

馮衍顯志賦意樹堪而不澹兮侯回風而容與求善卷之所存今遇許由干負

黍李賢注負黍亭名在洛州陽城縣西南許由墓在其南世人知洗耳事者多負黍有墓世罕知者爲附記之

唐書李嗣真傳高宗東封還詔贈孔子太師命有司爲祝文

郎中雷少頴文不稱旨更命嗣真成不淹頃嗣真天才開敏鑒古尤精其續畫品錄一編臚上中下九品漢魏以來作者粲然在目在唐人說部中最爲可貴者已

畫學秘訣語多冗沓斷非出于王右

丞也

郭恕先絹本岳陽樓圖高僅一尺五寸濶只一尺四寸而界劃精細樹石蒼古尺幅間具洞庭偉觀燕文貴匡廬清曉圖色澤醕古山巒重疊皆用重墨渲染而樓觀橋舶界畫殊覺謹嚴阮文達公曰以此知北宋人筆墨皆極工緻尺幅寸紙非數旬不成後人妄稱潑墨頃刻而辦豈得謂之畫哉

宣和畫譜有黃居寶架上銅觜圖唐忠祚柘枝銅觜圖趙昌芙蓉銅觜圖卽今蠟觜雀乎

畫師好襲前代高手之名倪瓚以山水名家前此宋有楊瓚

工墨竹唐有史瓚工鞍馬人物

詳歷代名畫記

此外如宋旭董旭馬

麟莊麟徐熙郭熙林良楊良祁岳顏岳戴嵩李嵩戴嶧顏嶧

不一而足

黃荃雖刁光允之弟子然荃之著色青黃紅白若堆漆然以

手摹之色與絹平較之刁生大有出藍之勝高房山雖師二

米然水墨中間用泥金以肖朝霞落日之態金墨相間古今

所無張蛻庵詩云前身朱方老於菟非過譽也馬和之鄭風

唐風豳風陳風等圖尤爲逸品懣壽平山水草樹全出和之

南田於人少許可而王石谷十萬圖冊南田贊不容口並題

其萬卷書樓云此卽雲林清悶閣也

十萬圖者萬竿烟雨萬點青蓮萬壑爭流萬山

雲起萬松疊翠萬卷書樓萬樹秋聲萬峯飛雪萬橫香雪萬里晴光也

山西通志麓臺山在祁

縣其形似臺上有龍洞別有小洞一一則龍孫據之一則昭

餘初之神潤濟侯據之禱雨輒應王司農名原和故字麓臺

云

麓臺亦能人物按四庫全書
典百二十卷其圖繪乃宋駿業王原和所製

萬壽盛

王石谷畫中凡輿轎駝馬之屬多命其弟子楊晉子鶴為寫
之或以此為石谷之短按吳道子亦然鄭槩開天傳信記吳
道元韋無忝陳閔同製金橋圖聖容及上所乘照夜白馬陳
閔主之橋梁山水車輿人物草樹鷹鳥器仗帷幕吳道元主
之狗馬驢騾牛羊橐駝猫猴猪独四足之屬韋無忝主之蓋
技有專長工期盡美此不足為石谷病也

國初有浙人許虎頭為金布政世楊

畫廬山栖賢寺五百羅漢
圖凡二百軸見廬山志

黃謁冀珪馬雲卿田景延皆金源畫師張觀沈鉉吳瓘莊麟
及伯顏不花並元季能手

黃謁見石渠隨筆冀珪見竹譜詳
錄馬雲卿學吳道子見秋澗集田

景延見靜修集馬與田又均見遺山詩中瓘字竹莊麟字文
昭伯顏不花者號蒼厓居士官江東廉訪精于山水尤工古

松壑雲

畫師高手不傳于世者甚多高江村云晦翁集中有題祝生畫長句又有觀祝孝友畫卷二斷句又有祝孝友作枕屏小景以霜餘茂樹名之一詩祝生何人晦翁吟咏至再至三其佳可知而圖繪寶鑑竟未之錄超按元時有何祕監者名澄官圖畫總管世爲燕人年九十餘趙松雪跋其歸去來圖云人物樹石一一皆有趣與張承旨疇齋書並稱二絕子昂書臻絕詣畫極精能固不輕許可者而服膺其人一至於此其佳可知而今世亦罕知者

閨閣工書

閨閣工書除衛夫人以外夫人名鑣字茂漪汝陰太守李矩之妻中書郎李充之母衛恆從妹集古錄云安公美政頌石壁寺鐵彌勒像頌並房璘妻高氏

書陸友研北雜誌云顧野王玉篇越本最善末題會稽吳氏
三一娘寫楷法殊精尤奇者唐貞元中有陳燕子丁兄義道
爲沙門兄妹合書小字法華經一部其字視褚爲莊視顏爲
逸墨蹟爲高江村購獲末有獨庵比丘道衍及龔芝麓等題
芝麓稱與善女人
智珠合十拜題尤爲希世之寶黃鉞兩朝恩賚記有唐僧
義道妙法蓮華經墨刻七冊卽是經也疑真跡已歸上方矣

華山碑

漢西岳華山廟碑題郭香察書洪适云東漢循莽禁無雙名
者郭香察書謂察蒞他人之書唐徐浩定爲
蔡中郎書趙岷亦云按碑
文京兆尹敕監都水掾霸陵杜遷市石遣書佐新豐郭香察
書市石察書顯然二事也

堯山

初學記二十四卷引王韶之始興記云含洄縣有堯山堯巡狩至于此立行臺又水經洄水注云堯山盤紆數百里赭巖迭起冠以青林與雲霞亂采山上有白石英山下有平陵有大堂基耆舊云堯行宮所則放勳亦嘗黃屋省方不獨虞帝攬蒼梧之轡也又以酈注盤紆數百里一語推之則今浚洸上下大廟香爐諸峽皆古堯山之巖岫矣

古籍譌字

山海經天山有神焉其狀如黃囊赤如丹火六足四翼渾敦無面目是識歌舞實爲帝江也案初學記文選注引此經竝作神鳥則焉字確爲鳥字之譌史記楚懷王名槐宋方甸跋詛楚文謂文中之熊相卽懷王其考證頗詳具載于方勺泊宅編則史記槐字爲字形之誤又後漢書趙岐傳著要子章

句要卽孟字古孟字作鼃鼃要相似而誤

張果毛仙

岑嘉州曾見張果集中有謁張果先生詩云吾君感至德元老欣來詣昌黎守潮郡亦嘗遇毛仙翁告以所歷官其後悉驗見程俱韓文公歷官記何唐時之多異人也

韓仲卿

昌黎父仲卿曾爲武昌令邑人立石頌德李太白爲其文後終于祕書郎舊唐書云父仲卿無名位誤甚矣不但仲卿仕宦如少卿雲卿紳卿皆至丞郎公子祖登第于長慶間孫衮咸通七年狀元及第

柳州世系

元魏柳慶兄弟五人驚慶虬檜驚慶仕至左僕射子厚七代

祖也三子機旦肅旦爲隋黃門侍郎子厚六代祖也

琅琊王氏

晉光祿大夫王覽

太保祥弟

生六子曰裁曰基曰會曰正曰彥

曰琛裁生導頴做基生含敦會生舒逵正生廙廙彬琛生稜侃凡有名于六代如珣珉曇首僧達僧綽騫儉規褒僧虔筠或皆導之後胡之秀之並廙之後羲之獻之並曠之後彭之彪之並彬之後王氏族望極繁然以瑯琊爲最盛本朝康熙中尙書米公思翰四子曰內大臣貞襄公馬斯喀曰大學士文穆公馬齊曰內大臣勤恪公馬武曰總管莊愨公李榮保如襄烈公傅清大學士文忠公傅恆皆莊愨之子果烈公明瑞伊犁將軍奎林大學士文襄公福康安大學士文襄公明亮並莊愨之孫福文襄之昆季曰福靈安福隆安福長安俱

躋一品均傳文忠之子計米公之後凡爲宰相者四人可謂極盛矣不減瑯琊王氏也

王裴並稱

明人韓昌箕撰王謝世家三十卷抑知東晉始推王謝晉初惟數王裴世說云裴散騎娶王太尉女婚後三日諸壻大會當時名士王裴子弟悉集是其證也迨于唐世謝氏已不甚顯而諸裴達者益多唐書宰相世系表西眷宰相有寂矩中眷宰相有遵慶樞贊光庭東眷宰相有居道休埒冕度其居洗馬川號洗馬裴者宰相有談炎卽朱躋台輔如裴寬兄弟輩皆明經刺史治第東都八院相對極一時之盛以裴方謝過之遠矣

錢氏之盛

龍眠三李系出南唐孟昶諸孫進士及第然十國之後要以
吳越爲最繁絳雲樓書目譜牒類一門有吳越世系歌吳越
錢氏分派畧其閥閱之華可以想見

眉山六子

東坡生邁迨過子由生遠迨遲坡詩合稱爲六子有云我家
六兒子流落三四州又云我家六男子樸學非時新又云六
子晨耕簞瓢出眾婦夜績燈火共

小兒名入詩

放翁喜小兒輩到行在詩阿綱學書蚓滿幅阿繪學語鶯轉
木遺山秋蠶詩朝來飼却上馬桑隔簇仍聞竹間雨阿容阿
璋墨滿面畫徹灰城前致語按以兒輩小名入詩唐人甚多
其格自晉宋間始泉明責子詩云阿舒已十二懶惰故無匹

阿宣行志學而不好文述雍端年十三不識尤與七通子垂六齡但覓棗與栗又謝混詩云阿多標獨解弱冠纘華廕微子基微尙無倦由慕蘭

尺赤通

蔡條鐵圍山叢談慣以赤字代尺二字古原通用宋玉鈞賦以出三赤之魚于數仞之水中放翁詩祠官粟一囊不瞻軀七赤聯翩三兒子俱作鶴雀碧

頰

以頰字代角字坡詩有焉其句云中和堂上東南頰獨有人間萬里風又以鍋字入詩有句云乾鍋更戛甘瓜羹

鼻煙

洪稚存先生七招自注云菸草一種百年來盛行近復尙鼻

烟皆刻玉爲瓶精者至穴大珠爲之又杭大宗嶰谷馬君傳
君迎駕江壩疊蒙恩賚賜御書石刻貂緞荷包鼻烟壺等物
則鼻烟之起當在乾隆之初是物最難藏弄東坡寄周安孺
茶詩云苦畏梅潤侵暖須人氣煥又若廉夫心難將微穢瀆
似爲鼻烟咏也

鍾馗

宋時歲杪挂鍾馗像放翁詩中疊見之新歲詩云改歲鍾馗
在依然舊綠襦老庖供餽飪跣婢暝屠蘇又歲首書事云中
夜祭餘分餽飪犁明人起換鍾馗又辛酉除夕云登梯挂鍾
馗祭竈分其餘又開歲陰雨連日未止云應時餽飪聊從俗
耐久鍾馗儼在門並注云子貧甚今歲遂不易鍾馗

五言似詩者

傳大士偈云心疑生暗鬼眼病見空花二語似晚唐人虎鈐
經結營統論云將軍居青龍旗鼓居蓬星士卒居明堂伏兵
居太陰馬融長笛賦屈平適樂國介推還受祿澹臺載尸歸
皋魚節其哭長萬輟逆謀渠彌不復惡皆似五言古詩

鄧魴

香山有讀鄧魴詩云未及看姓名疑是陶潛詩天不與爵壽
惟與好文詞則魴詩必佳惜傳世者少

何山

湖州諺云金蓋戴帽要雨就到金蓋謂何山也因何楷而得
名楷名不見晉書惟沈約宋書何子平傳云曾祖楷爲晉侍
中

吳羌山

吳均入東記吳羌山者漢高士吳羌避王莽之亂寓居此山
後人名焉宋沈麟士講經教授于此從學者數百人時爲語
曰吳羌山中有賢士閉門教授居成市今南史作差蓋字之
訛

樊宗師文

絳守園池記除瀑三尺餘涎玉沫珠蒼官青士與槐朋友寶
龜靈廳文文章桃李蘭蕙神君仙人提鵬挈鷺素女雪舞
十數句外多不可解支遁坐右銘皆禪語惟人生一世消若
露垂達人懷德知安必危四句畧近儒家

甄鸞

甄鸞者北周司隸校尉漢中郡守凡周髀算經注孫子算經
注術數記遺注五曹算經注五經算術等鸞所撰蓋北朝博

洽多通之士非庾蘭成輩僅工文藻者比

溫子昇

溫鵬舉詩云桐華引仙露槐影麗卿烟宛然沈宋語元暉業
贊以含任吐沈信不虛也又按子昇有大覺寺碑云置須彌
于葦蕪納世界于微塵葦蕪句不知何本俟攷

易緯

易緯乾鑿度乾爲天門坤爲人門巽爲風門艮爲鬼冥門四
語奇絕張平子髑髏賦云取耳北坎求目南離使東震獻足
西坤授腹亦本易緯也乾鑿度云乾爲頭首坤爲胃腹兌口
離目艮手震足

房千里

唐房千里與許丁卯相善其留粵愛姬改適韋氏許作詩寄

之云爲報西游減離恨阮郎才去嫁劉郎然千里博洽多聞
著述視許爲富如竹室記云人之百骸上陽而下陰陽戒于
煥故膏盲欲寒陰戒于溺故腎脅欲煥蓋深于靈素之學者
又如所撰投荒雜錄古來嶺南軼事頗賴以傳廣輿記稱雷
州雷神爲陳時陳文玉由雷震巨卵而生有文在手曰雷州
後拜本州刺史雜錄亦畧同而官闕姓名則作牙門將陳義
輿記後人所輯自當以千里之說爲確又如骰子選格雖文
人游戲而唐時官制見焉唐書藝文志云千里字鵠舉太和
初進士高州刺史

寄生

劉基伐寄生賦疣贅蛭嘬兮枝牽蔓縈瘠人以肥已兮偷以
長榮然爾雅寓木宛童郭注寄生樹一名蔦郝懿行疏備引

本草諸書且云同幹異條自成叢茂雖名寄公獨標高異亦猶兔絲女蘿附物而不易其操故詩人並致諷詠焉則是物且爲嘉卉矣

木三則

世因匠石寓言詆櫟爲不材之木其實櫟與樗均非棄物也管子五粟之土其柘其櫟與柘並稱淮南子十二月其樹櫟注可爲車轂今江淮間櫟炭爲最櫟林冬炭見于坡詩豈一無可用之木哉櫟亦二種有山櫟下田櫟之別王荇潛夫論云後世聖人易以棺槨中世以後轉用楸梓槐柏柁櫟之屬各因方土裁用膠漆是櫟之爲用且有可爲楸柁之需者唐劉禹錫立秋前後製櫟根餽飽取櫟根一兩和麵爲之見山居清供爾雅疏稱山櫟葉多鋸齒可爲車軸櫟櫟漆相似

如一固當分別觀之耳

陸士衡詩惡木豈無枝志士多苦心語本管子今管子非全

書也讀李善注可知

管子且非完帙况舊海珠塵之康成歲實有起廢疾乎

松之三鬢者曰孔雀松

見西陽雜俎

梅之一帶三花者曰品字梅

九言梅花詩乃釋中峯所作

橘不踰淮榕不過贛水榆者大可十圍實小

如柰南海人樹之固隄山檢者新會縣圭峯最多可以染布

記蒔

沙門心印日記蒔隋煬帝致天台智者書南岳禪師親所記蒔又山谷黃龍心禪師墓誌庭堅夙承記蒔是也一說瓦券曰蒔洪稚存晉太康五年買地蒔歌童君好古無一田一瓦乃直二百千抱瓦日向高齋眠

器玩

四條

古人無珍奇之玩木中之梓卽爲至美樂器琴瑟酒器之疊皆梓爲之公卿方得用金疊天子方得用玉疊也

分支卽今合同鉤簞猶今撲滿

魏了翁詩富歲先占訟鉤稀亦撲滿類也

香毬一

稱金鉅

司馬相如美人賦金鉅熏香

溺器一名漩盤

見周公謹志雅堂雜鈔

簞局熏

籠也寶子被爐也

元人趙青山論琴詞云妙處在一聲清拙自注道士朱復古

善彈琴爲予言琴須帶拙聲若太巧則與箏阮何異

絕文達公曰琴

派各家不一而清微淡遠惟虞山爲最虞山謂嚴道微常熟人也

爾雅肉倍好謂之璧好倍肉謂之瑗肉好若一謂之環郭注

甚簡不及李巡舊注之暢左氏昭十六年正義引巡注云好

孔也肉倍好邊肉大其孔小也好倍肉其孔大邊肉小也肉

好若一其孔及邊肉大小適等曰環也又按元微之蠻子朝

詩云清平官繫金呿嗟求天叩地持雙珙以珙代璧究未爲穩愜也

旒窩

宋世樞垣官屬號爲旒窩至政和初其權愈重見燕翼詒謀錄一甲第三第二均稱榜眼朱巖以第三人及第王元之贈詩云榜眼科名釋褐初見魏道輔詩話

王仁裕

五代王仁裕生平作詩至萬首蜀中人以詩窖子呼之出使荆南高從誨出十妓彈胡琴侑飲仁裕卽席賦詩上從誨云紅粧齊抱紫檀槽一抹朱絃四十條荆人傳誦然洪邁容齋隨筆摘仁裕開天遺事最舛謬者四條一梁公姚崇非開元初作翰林學士一代公郭元振貶死十年張嘉貞方入相而

謂是嘉貞之壻一張九齡去位十載楊國忠始得官而云九齡不肯造國忠之門一蘇頌作相時張九齡尙未達而云九齡覽其文字稱爲文陣雄師似此四端所駁詰皆確當之至蓋仁裕蜀亡至陝采撫民言得遺事一百五十九條雖分四卷實皆委巷之談傳聞不無失實宜容齋之指摘也

容齋又嘗痛駁

王通中說謂薛收以大業十三年歸唐而文中子世家云江都難作通有疾召薛收共語如藥語矣

伸蒙等書

伸蒙一書艱澀無味卽續孟子之林慎思所撰中有槐里辯三篇干祿字加山知道字加水求己字加石又有澤國紀三篇宏文字加戈甲如愚字加耒旁廬乳字加瓦旁其謬極矣第慎思不受巢賊僞官罵賊而死取其忠可耳近世有吳氏學舫一書謂嬰兒頂有髮旋爲人之河圖黃河居中眾水分

流爲地之河圖三垣五行日月列宿爲天之河圖又陸奎勲
陸堂易學謂伏羲但畫八卦黃帝始立乾坤八卦之名堯舜
加以屯蒙諸卦伏羲乃方圖黃帝唐虞亦方圖連山歸藏乃
圓圖其誕與伸蒙等

香山二則

白香山母不得其死始發狂以葦刀自剄人救之而免後卒
斃于坎井高彥休唐闕史記其事陳直齋香山年譜全錄之
直齋博洽多聞馬端臨經籍考尚據
直齋書錄解題及晁公武讀書記當時江州之貶卽因言
者謂香山之母看花墮井而死緣是左遷鮑氏知不足齋叢
書所刊唐闕史無此一條殊不可解

白詩好用當時里巷地名酬張十八云遠從延康里來訪曲
江濱酬吳七云君住安邑里左右車徒喧寄元八云歸來照

國里人臥馬歇鞍哭李三詩云去年渭水曲秋時訪我來今年常樂里春日哭君回又夢與李七庾三十三同訪元九云同過靖安里下馬尋元九似此甚多未免太質然如寄微之詩云淺色縠衫輕似霧紡花紗袴薄于雲又夢游春詩云裙腰銀線壓梳掌金筐蹙帶纈紫蒲桃袴花紅石竹又何其旖旎也

包明月

五言五句格調尤不易工梁宮人包明月歌云當曙與未曙百鳥啼前窓獨眠抱被嘆憶我懷中儂單情何時雙此外有沈充前溪歌亦只五句

酈炎趙岐

後漢書酈炎傳載其詩云靈芝生河洲動搖因洪波蘭榮一

何晚嚴霜瘁其柯哀哉二芳草不植太山阿文質道所貴遭
時用有嘉絳灌臨衡宰謂誼崇浮華賢才抑不用遠投荆南
沙抱玉乘龍驤不逢樂與和安得孔仲尼爲世陳四科古歌
麻二韻通用又趙岐傳云可立一員石于吾墓前刻之曰漢
有逸人姓趙名嘉有志無時命也奈何四語卽墓銘也嘉何
叶韻自爲墓銘蓋自岐始章懷太子岐傳注引决錄序常以元冬夢黃髮之士姓元名明字子真與余海言言必有中善否之間無所依違命操筆者書之夫立說著書何必託言夢境岐亦可謂誕矣

同姓名者

後漢兩劉寵皆宗室一字榮祖東萊牟平人齊悼惠王之後
官會稽太守選一大錢者也一陳敬王羨之曾孫善射十發
十中中皆同處嗣封陳王見害于袁術四劉歆一劉向之子
一昌城侯劉植之從兄字細君一更始之子封穀孰侯一桓

帝之左丞見桓彬傳漢宣帝之子為孝元帝後漢靈帝之祖

淑亦諡孝元皇

靈帝紀追封皇祖為孝元皇夫人夏氏為孝元皇后考為孝仁皇夫人董氏為桓園貴人

然桓靈追尊其祖父均只稱皇桓帝紀追尊皇祖母河間孝王曰孝穆皇夫人趙氏曰孝穆皇后考靈帝侯曰孝崇皇皇母

氏為孝崇博園貴人

伏波將軍漢魏晉秦凡數人漢路博德馬援陳

登魏夏侯惇晉陶延孫秀葛洪苻秦索斐朱買臣凡二一漢

會稽太守一梁宣猛將軍

乃奄人官武昌太守為蕭繹劾應大沈麟棟等弟兄于水者

唐

有王珪宋亦有王珪漢有李善唐亦有李善唐有蔡京宋亦

有蔡京如唐之兩李珣同時本朝之兩于成龍並世則尤奇

矣

本朝蔣虎臣先生名超前此晉有蔣超官北軍中侯曾統江夏太守陶侃武陵太守苗光等屯夏口以拒陳敏敏不

敢闕境見劉宏傳

百號將軍

梁武帝普通六年定百號將軍凡一百二十五將軍二十八

班其爾朱仲遠之定洛大將軍仍不在其數陳世官制多本
梁也天監七年置十二卿太常宗正大司農爲春卿太府少
府太僕爲夏卿衛尉廷尉大匠爲秋卿光祿鴻臚太舟爲冬
卿太舟卽都水使者詳隋書百官志

南齊楷語卷之四

江都蔣超伯輯

賴恭

三國志蜀先主傳羣下上先主爲漢中王表于漢帝曰平西將軍都亭侯臣馬超左將軍領長史鎮軍將軍臣許靖營司馬臣龐義議曹從事中郎軍議中郎將臣射援軍師將軍臣諸葛亮盪寇將軍漢壽亭侯臣關征虜將軍新亭侯臣張飛征西將軍臣黃忠鎮遠將軍臣賴恭揚武將軍臣法正興業將軍臣李嚴等此奏先列超者蓋馬氏爲西州右族曹瞞所畏新來歸附故首列之吳志薛綜傳稱零陵賴恭先輩仁謹不曉時事是奏列名法正之上蓋亦有時望者華陽國志羣下上先主爲漢中王其文李朝所撰則是表當亦由朝製矣

益部耆舊雜記朝
弟兄號李氏三龍

古書多淆亂

古書多爲後人羈亂如莊休之外篇雜篇有漢人攙入語其
改田恒爲田常卽確證也馬遷之史記馮商孟柳均曾續之
見劉歆七略漢章帝時又曾詔楊終刪之見終本傳則今之
遷史非原書也蒼頡篇曰漢兼天下則非李斯語也本草多
漢世郡名恐非神農作也易林繇詞世疑有崔篆增入者亦
非焦氏本書也

三蒼

三蒼者蒼頡篇秦相李斯作訓纂篇楊雄作傍喜篇賈魴作
總曰三蒼其訓詁三卷埤蒼二卷並張揖撰廣蒼一卷則樊
恭撰也見隋唐經籍志漢世同爾雅合稱蒼雅蜀志來敏傳

云尤精蒼雅是其證也與凡將急就並爲小學家之祖

漢晉人五言之似詩者

漢費鳳碑其後悉五言韻語有云耕夫釋耒耜桑女投鉤簪道阻而且長起坐淚如雨晉時襄陽小兒歌曰山公何所去往至高陽池日夕倒載歸酩酊無所知時時能騎馬倒著白接羅舉鞭問葛疆何如并州兒又崔鴻崔氏家傳載河內人爲崔瑗歌云上天降神君錫我慈仁父臨民布德澤恩惠施以序穿溝廣灌溉決渠作甘雨續安帝紀淮泗人歌司馬休之云可憐司馬公作性甚溫良憶昔水邊戲使我不能忘

雄尙緄撫

後漢書張宗法雄等傳贊江淮岱虔劉寇阻其誰清之雄尙緄撫晉書劉頌傳時人爲之語曰雷蔣穀魯劉最爲祖唐

書張嘉貞傳令君四俊苗呂崔員崔鉉傳鄭楊段薛炙手可熱欲得命通魯紹瓊蒙以上四條句法相類

大鸛

晉書韓友傳宣城太守殷祐有病友筮之曰七月晦日將有大鸛鳥來集廳事上宜勤伺取獲者爲善祐乃謹爲其備至日果有大鸛垂尾九尺來集掩捕得之祐乃遷石頭督護爲吳郡太守鸛鳥不知何狀淵鑑類函又引作鸛鳥書以俟攷

石經

蔡中郎所書石經碑共四十六枚見本傳注近時杭大宗以書丹不止中郎一人並以顧亭林攷据猶略譏石經攷異二卷蓋漢魏北齊唐宋蜀均有石經

趙佗

趙甌北先生云漢書趙佗卒于建元四年其時漢興已七十年佗應年百餘歲乃廣東新語則云尉佗飲九眼井水肌體潤澤年百有餘歲視聽不衰殆附會之說耳

三越

吳越閩越南越合稱三越阮嗣宗代鄭冲勸晉王箋威加南

海名懾三越

唐書南蠻傳滇中浪穹等部總名滇人亦稱三浪今廣東以廉郡轄三縣謂之三廉羅定州與

東安西甯同稱三羅附記于此

王銍

王銍跋范仲尹墓誌謂志怪集括異志倦游錄皆魏泰撰托名張師正然雲仙雜記龍城錄樹萱錄均銍所偽撰也雲仙雜記尤謬如謂金鑾十歲忽書北山移文不思金鑾三歲而殤白集有詩云衰病四十身嬌痴三歲女一朝捨我去魂影

無處所何嘗過十齡耶

梅聖俞二則

碧雲駮固魏泰杜撰然范文正公坐貶時梅聖俞作靈烏賦以寄及公秉政聖俞以公不援已也又作靈烏後賦以誚焉世以此薄聖俞見石林燕語

梅聖俞木山詩蘇夫子見之驚且喜買與溪叟憑貂裘黃山谷答永新宗令寄石耳詩閔仲叔不以口腹累安邑我其敢用鮭菜煩嘉禾句調相類大率黃詩多有似宛陵處

小諫

唐時補闕拾遺一稱小諫雲溪友議呂元芳相觀察判官任轂云止于小諫不換朱衣又鄭谷詩小諫升中諫三年侍王

除

梁唐之世紫衣最貴舊五代史唐明宗紀詔天下諸州府不得奏薦著紫衣官員爲州縣官

錢百爲陌

五季時千百之百皆加丁爲陌舊五代史姚顗傳終身無喜

怒不知錢百之爲陌泰百之爲銖

撰子夏易傳之張狐五季人也其素履子履道篇云

近代淮南高公建置延和閣求道非也其人當在晉漢周時矣

唐時三輔小兒羸病謂之羣

姑見匡謬正俗

顏師古以爲巫蠱二字之誤

衙衙

朝鮮王城街巷亦名衙衙朴齊家城市全圖應令詩云五城衙衙列次第大都宮殿疏源委黎峴鐘樓及七牌是謂都城

三大市

抵鴉

陳孚安南卽事詩抵鴉身偃豕羅我背拳狐抵鴉者蠻中布

輿之稱羅我者象背施鞍而坐亦見嶺外代答

明世安南進代身金人作

南齊書卷之四

四

囚服面縛之狀鑄其背曰安南黎氏嗣孫黎某某不得蒲伏
天門恭進代身金人悔罪乞恩二十五字詳見涌幢小品

韋使君

香山詩云蘇州及彭澤與我不同時韋白既不同時則李觀
集中所詆之蘇州韋使君必非應物也

魯公賓客

顏魯公守湖州時書伯父顏元孫干祿字書勒石其峴山李
相石樽聯句凡二十九人公及劉全白裴循張薦吳筠強蒙
范縉王純魏理王脩甫顏峴左輔元劉茂顏渾楊德元韋介
釋清晝崔宏文仲宣陸羽邱子中陸士脩裴幼清柳淡釋塵
外顏顥顏頎顏須李萼其中佳句如楊德元之醉後接離倒
歸時騶騎喧陸羽之松深引閑步葛弱供險捫邱子中之花
氣酒中馥雲華衣上屯顏顥之萍連浦中嶼竹繞山下村皆

有陰何遺意東坡詩魯公賓客皆詩酒正指此耳峴後與家

僮銀鹿始終隨公于蔡州

詳國史補

明人陸嘉穎集古來義僕事

以銀鹿爲首曰銀鹿春秋云

劉全白後亦守湖吳筠後隱嵩陽爲道士李萼其時爲防禦副

使左輔元精韻學有增廣龍海五百卷額頤須峴極一門裙履之盛又按公子頤官太子洗馬頂協律郎頤秘書郎見公

祭伯父豪州刺史文詳高江村銷夏錄

懷素草書

懷素自敘真跡凡三本一歸石揚休一在蘇子美家一爲金毛鼠馮相所得馮本後歸上方石本黃涪翁曾一臨之蘇本缺前六行子美爲補書國初爲高江村購獲

顏魯公

三則

皎然者康樂十世孫顏魯公于杼山立謝臨川寫真堂又起桂棚三癸亭皆從皎公請也三癸者以建亭歲月日皆癸故

也銘詞有曰三癸嶙峋羣彥惠臻

顏魯公臧懷恪神道碑公卽銀州之第三子也身長六尺一

寸眉目雄朗髯髯灑秀灑字形容美髯入妙

劉曜髯不甚多而皆長三尺唐

文皇虬髯可挂一弓明成祖髯長一尺八寸皆奇表也

顏魯公請復七聖謚號狀云元宗之末奸臣擅柄遂廣累聖之謚有加至十一字者帝則悉有大聖之號后則皆有順聖之名非舊制也其後劍門下罪已之詔高祖以下悉用舊謚則元宗悔既往之失亦以明矣臣愚謂高祖以下謚號悉宜取初謚爲定宜上高祖爲武皇帝太宗爲文皇帝高宗爲天皇大帝中宗爲孝和皇帝睿宗爲聖真皇帝元宗爲孝明皇帝肅宗爲孝宣皇帝云云今按唐時謚號雖繁當時所稱仍止二字高祖曰神堯太宗曰文皇中宗曰孝和元宗曰明皇

肅宗曰宣皇惟高宗閒有稱爲天皇大帝者如李邕鄭州大

雲寺碑是已

舊唐書于列帝憲宗稱章武穆宗稱文惠敬宗稱昭愍文宗稱昭獻武宗稱昭肅宣宗稱獻文

梅妃

坊刻叢書有曹鄴梅妃傳妃事迹不見于史殆杜撰耳或云粧樓記有之然粧樓記亦無稽小說非張泌筆也

葛

周初葛利最溥毛詩葛覃傳云葛所以爲絺綌爾雅釋訓是刈是鑊鑊煮之也舍人曰是刈刈取之是漚煮治之其時雖后妃之家皆習女功之事如此又汲冢書文傳解云潤濕不穀樹之竹葦莞蒲礫石不可穀樹之葛藟以爲絲綌以爲材用當日布帛所從出桑之外惟葛耳自宋元以後徧植木綿于是葛利始微僅嶺外之氓藉爲生計北人幾不識葛爲何

狀矣

秦將

秦時西州大姓牛雙推戴姚萇萇稱秦王以雙為秦將見古

今姓氏書辨證疑秦將之名始此

列子說符篇稱牛缺大儒下之邯鄲遇盜于耦沙之

中亦牛氏故實附記

苻堅母

十六國春秋苻堅母苟氏祈子西門豹祠歸而夢與神交遂

孕晉書亦同此妄說也車煩秦書云堅母苟氏自西門豹祠

歸夜夢若有龍蛇感已遂懷妊而生堅此說較尤車氏書已

逸是條存御覽中

徐統謂堅大貴亦出頻書

王猛墓至今在

陳傅良曰王猛相秦十丁抽一其兵制猶見忠厚昔人以爲

有靖中原之功豈不信哉按猛墓在壽光明萬歷初邑民浚

井得之至國朝康熙三十七年知縣劉有成為立祠樹碣見蔡

梅庵編脩詩集噫錢文通之塋土取自黃墳詳楊樞李西涯之墓碑

搗充鹽屑見寄園寄所寄而建元片石胥井長留丞相祠堂路人猶

拜足見千秋之公論已

清都

袁淑桐賦云儀丹邱之瑞羽棲清都之仙宮西陽雜俎青桐

君星子詞一條似卽從此生出

鸞老

唐人才鬼記文明中竟陵劉諷夜投夷陵空館聞眾女郎行

酒令令曰鸞老頭腦好好頭腦鸞老一女郎云昔賀若弼弄

長孫鸞侍郎以其年老口吃又無髮造爲此令傳說數巡其

青衣名紫綬者素吃訥令至但稱鸞鸞鸞女郎皆笑諷大聲噓咳庭中無復一物此又艾艾期期以外口吃人一故事矣

夢棺

陳士元夢占逸旨云將涖官則夢棺將得錢則夢穢注引晉書殷浩語浩云官本臭腐故得官而夢尸錢本糞土故得錢而夢穢超按思補齋筆記云鐵冶亭尙書乾隆壬子典試江南闈中夢人贈巨櫨四枚至癸丑潘文恭公得狀元至己未史大司寇致儼得會元至壬戌吳棣華先生廷琛得會狀果協四櫨之兆夢棺得官猶之夢櫨得元此諧聲之義浩云官本臭腐恐非

寶祐登科記

王應麟爲考官其一甲第九人爲王應鳳卽應麟弟當時未
有回避例也是科一甲第一爲文信國二甲第一爲謝疊山
第二十七爲陸秀夫是年寶祐四年登科記僅一卷觀者肅
然起敬彼藝海珠塵所輯洪武四年登科錄提調汪胡二相
狀元爲吳伯宗何足異哉洪武登科錄亦與今制迥殊狀元
均授部主事二甲授主事及司計三甲皆授縣丞三甲第五
名金濤乃高麗人附記之備攷又按梅氏歷學疑問補洪武
中吳伯宗李翀奉詔翻譯回回歷當卽此人矣

奎星

後漢書蘇竟與劉襲書曰奎爲壽螯主庫兵注引春秋合誠
圖曰奎主武庫之兵是奎星天之武庫與文事無干世因宋
初五星聚奎遂附會爲文星不加考究元人馬祖常詩云天
章爛漫象西奎又云眾星分次繞明奎又云應有商霖應上

奎近于杜撰矣卽郝經祭元遺山文天奎不芒遂入杳冥王
惲題遺山詩後云不放奎光到玉除亦俗說也宋季太學諸
生捲堂文云炳炳宸奎釐爲四學萎萎束帛例及諸生意以
宸奎代宸翰也尤爲捏湊已卽偏僻如朱謀瑋其解履虎尾
乾居西北當奎婁白虎之尾故
曰履虎尾亦
不指爲文星

貴宿

玉鈐經人之受生直賢宿則賢直貴宿則貴微子感牽牛老
子感火星張良感弧星樊噲感狼星子路感雷精顏子感中
台豈中台但爲賢宿非貴宿乎此不足深辨者矣

曾華

大戴禮曾子疾病曾元抑首曾華抱足盧辨注元華其子

記孔子事

二則

滄海橫流出范武子穀梁傳序孔子觀滄海之橫流乃喟然

而嘆

荀崧稱穀梁文清義約多所發明而元帝詔謂穀梁膚淺不足置博士見晉書崧傳

孔子讀易韋編三絕鐵撾三折漆書三滅然唐人撾多作撻

陸甫里聯句豈獨斷韋編幾將刊鐵撻是其證也至王洙談

錄云顏回讀書鐵鐫三摧則且以爲顏子事矣

漢明帝詔曰鼎象三公當

是古易緯之文章懷注非

風

爾雅春爲發生夏爲長羸秋爲收成冬爲安甯四語皆指風而言尸子仁意篇春爲發生上有其風二字蓋此一條言風

下一條言雨

孝經

梁書皇侃性至孝常日誦孝經二十遍以擬觀世音經明季

黃忠端公楷書孝經墨刻此庶人之孝也下引詩曰我稼既同上入執宮功畫爾于茅穹爾索綯亟其乘屋其始播百穀二十五字不知何據程春海曰古今文及足利本吳澄草廬本皆不引詩黃書不足信也

筆乘

焦弱侯筆乘有攷證極精者如譽阿毀卽墨其人爲周破胡見列女傳崔浩之禍不專爲國史因有異志謀洩被誅見宋書柳元景傳尤讀書得閒處矣

論孟

五條

太平御覽引魯論觚不觚一節古注曰孔子曰削觚而志有所念觚不時成故曰觚哉觚哉觚小器耳心不專一尙不時成況于大事乎此解頗合各家均看得太深聖人之言簡明

豈故作推敲者

昌黎論語筆解謂興於詩三句皆指詩言李翱亦云發乎情是興於詩也止乎禮義是立於禮也刪詩而樂正雅頌是成於樂也三經一源也退之得之矣包氏無取焉

魏志劉靖傳上疏陳儒訓之本曰舉善而教不能則勸浮華交游不禁自息矣係四字爲句晉書劉宏傳汴鄉令虞潭首唱義舉舉善以教不能者勸宏靖子也魏晉時魯論句讀如此與今時異

不可以作巫醫當依鄭注巫醫不能治無恒之人其解爲當緇衣曰子曰南人有言人而無恒不可爲卜筮禮記出于漢人蓋漢儒皆主此說

詳劉氏論語駢枝

章懷太子後漢書王龔傳論注引劉熙注孟子曰折枝若今

之按摩也

裋

說文裋棺中縑裏也段玉裁曰喪大記君裏棺用朱綠用雜金鐔大夫裏棺用元綠用牛骨鐔士不綠三綠字皆當作裋謂君朱裋以三色金鐔椽著之大夫元裋以牛骨鐔椽著之士賤不裋三綠字皆裋字之誤史記楚世家吞三翩六翼索隱曰謂九鼎也蓋翩卽扁借字翼卽鈇借字鼎附耳爲鈇

蕃鬣

明堂位周人黃馬蕃鬣舊解蕃赤也王文簡公曰蕃字古無訓赤者蓋白色也讀若老人髮白曰皤之皤白蒿謂之繫白鼠謂之鼯馬之白鬣者曰蕃鬣其義一耳

鵠

古皆鸞鳳鸞鶴連言而左太冲吳都賦云彈鸞鵠射狻狴李

善注南方有鳥曰羗鵠

字彙補南方有鳥名羗鵠黃頭赤目五色皆備又鵠字之譌

患

粵人呼物之稚者爲患小船曰艇患小益曰盆患古亦有之
藝文類聚七十三引爾雅舊注云薊子鼎

漢時語

漢時堂下發輒謂爲令簋

周官匠人注云堂涂謂階前若今令簋也賈疏漢時名堂涂

爲令簋輒爾雅則令字从瓦郭注云輒輒也今江東呼飯簋

有所表識謂之揭

王藻音豬

先生有羣經揭藝專攻毀漢學者命名本此

華表曰桓喪車曰柳

搏風

屋翼曰搏風

甘泉賦注一稱拒鵠

拒鵠

宋史輿服志

屋檐曰雀栢

見方屋四

角引出曰陽馬

景福殿賦注

廳廊曰步廡

見唐書崔郾傳

長廊有闌楯曰

旱船見湛淵

復闌曰重櫟

見史記注

小屏曰防

文選注爾雅容謂之防

樓梯

曰亟道

見世說

造鹽

古時民家皆許造鹽周禮天官鹽人女鹽二十人注女鹽女奴曉鹽者曰曉鹽則能造可知齊民要術有常滿鹽一法以不津瓮受十石者一口置庭中石上以白鹽滿之以甘水泛之令上恒有淅水用時挹取煎即成鹽還以甘水添之取一升添一升即造鹽法也元世天台陳椿有熬波圖凡打瀉晒淮鹽法志圖繪尤精其議論亦較胡氏淮饒本論為備

造磚

明時蘇州造磚窯戶擾累有自殺者工部郎中張問之督役目見乃以採煉燒造之艱每事繪圖貼說曰造磚圖說世以

鄭介夫繪流民比之其時工匠多錫山人燒造旣艱伎亦稱最迄今大江南北以無錫之磚爲貴磚窯相望絡繹不絕在當時爲稅政在今日爲利源此又問之所不及料者也

吹埧

爾雅大埧謂之跽郭注埧燒土爲之大如鵝子銳上平底形如稱錘六孔小者如雞子按此物今不恒見吹者甚稀宋張天覺上書詆一時詞臣云今之所謂詞臣者曰陳繹曰王益柔曰許將是已臣嘗評之陳繹之文如欵段老驥筋力雖勞而不成步驟王益柔之文如村夫織機杼雖成幅而不成錦繡許將之文如稚子吹埧終日喧呼而不合律呂意宋時童稚多有吹此者故天覺取譬及之

南海賢吏

後漢書吳祐傳父恢爲南海太守祐年十二隨從到官恢欲殺青簡以寫經書祐諫曰今大人踰越五嶺遠在海濱其俗誠陋然舊多珍怪上爲國家所疑下爲權戚所望此書若成卽載之兼兩昔馬援以薏苡興謗王陽以衣囊微名嫌疑之間誠先賢所慎也恢乃止撫其首曰吳氏世不乏季子矣及年二十喪父居無擔石祐固夙慧恢亦真清無愧廣州名宦也又按三國志鍾離牧傳赤烏五年遷南海太守注引會稽典錄曰高涼賊帥仍弩等破略百姓殘害吏民牧越界撲討旬日降服又揭陽縣賊帥曾夏等眾數千人厯十餘年以侯爵雜繒千匹下書購募絕不可得牧遣使慰譬登皆首服自改爲良民始興太守羊銜稱其威恩部伍智勇分明加操行清純有古人之風在郡四年以疾去職尤南海宦蹟之稱最

者也

唐書蕭倣傳南海多殺紙倣較諸子繕補殘書于虞諫曰書成不可露資必載以囊筒貧者同望得無意苴嫌

乎倣曰善乃止與吳恢事後先一致

五將三門

高彪上督軍御史第五永箴曰天有太一五將三門地有九變邱陵山川人有計策六奇五間總茲三事謀則咨詢無曰已能務在求賢議郎蔡邕等覩其文皆自以爲不及章懷太子此注亦極詳核按虎鈴經結營統論大將軍居九天之上頓泊玉帳注九天青龍也玉帳者進前隨六甲所居凡戰背虎尾向黃旛吉午戌歲黃旛在戌虎尾在辰子辰歲黃旛在辰虎尾在戌卯未歲黃旛在未虎尾在丑酉丑歲黃旛在丑虎尾在未詳虎鈴經卷十一營門向陽以受生氣不飲死水不處死地謂邱墓不居地柱四下中高也不居地獄四高中下也不居天竈大谷口

不居龍首山之端也其旨與三門五將及孫子九變篇亦復脗合

爲附錄之

番爲司徒

崔琦外戚箴匪賢是尙番爲司徒荷爵負乘采食名都詩人是刺德用不憚李賢注詩小雅也番幽王之后親黨也幽王淫色不尙賢德之人寵其后親而以番爲司徒之官又云憚大也音呼謂詩人刺番爲司徒及皇父都向用其后親黨是

以其德不大也賢注與鄭箋異旨鄭謂刺厲王賢謂刺幽王

然琦以文章通博見稱七子中獨舉司徒必有師說鄭云皆

后嬖寵賢云王后親黨唐初去晉宋六朝猶近賢語必有所

本斷非影響之談也

李固傳引老子曰其進銳其退速也亦必有據未可指爲孟字之訛

蝠

埤雅引星禽衍法曰角木蛟亢金龍氏土貉房日兔心月狐
尾火虎箕水豹斗木獬牛金牛女土蝠虛日鼠危月燕室火
猪壁水獬奎木狼婁金狗胃土雉昂日雞畢月烏觜火猴參
水猿井木犴鬼金羊柳土獐星日馬張月鹿翼火蛇軫水蚓
並云獬或作獬犴或作雁蓋非是超按蝙蝠單稱一字其來
已古崔琦外戚箴暴辛惑婦拒諫自孤蝠蛇其心縱毒不辜

頡頏星

頡頏星如大甕前卑後高出則大將死見虎鈴經妖星篇

張釜

廣州九曜石有宋張釜等題字釜與沈繼祖胡紘余壽京鏜
何澹同時力詆朱子者其字可削也邢凱坦齋通編盛譽京
鏜其人可知矣

成語

鴛鴦繡出從君看莫把金針度與人二語見朱子語錄疑是唐人詩句又見遺山詩中

曲江濤

枚乘七發將以八月之望與諸侯遠方交游兄弟並往觀濤乎廣陵之曲江李善注云漢書廣陵國屬吳地近世文選于氏集評公然注曰今錢唐江指錢唐爲曲江其誤原不始于氏卽前人辨論者亦多按吳志孫權傳黃武四年注引吳錄曰是冬魏文帝至廣陵臨江觀兵旌旗彌數百里有渡江之志帝見波濤洶涌嘆曰嗟乎固天所以隔南北也遂歸又按淮南子人間訓云江水之始出于岷山也可擻裳而越也及至乎下洞庭驚石城經丹徒起波濤舟杭一日不能濟也丹

徒與廣陵相望曰舟杭一日不能濟則濤瀾之壯可知又蕭子顯齊書州郡志云南兗州鎮廣陵刺史每以秋月多出海陵觀濤與京口對岸江之壯闊處也尤爲確證豈容橫生異議近日誦于氏集評者多惑人匪淺特爲正之

青宮

班孟堅終南山賦伊彼終南巋嶺囷圜青宮觸紫宸章樵注青宮紫宸天帝之居言山高峻上極于天

杜詩春山紫邏長選環繞也

山川異事

山崩川竭天地之大變也莫甚于明之季世涌幢小品述嘉靖三十四年乙卯十二月十二日壬寅山西河南山陝同日地大震聲如雷或城屋陷入地中或平地突成山阜壓死吏民奏報有名者八十三萬有奇致仕南兵書韓邦奇南光祿

馬理祭酒王維楨同日死焉此外仍有渭南郎中薛祖學等
其後疊次地震有力之家多製板屋以防禍又云萬厯二十
七年八月陝西狄道毛家坡山長二百餘丈崩裂一半其下
沖成一池山南平地涌出大小山五座約高二十餘丈未崩
之先山下火光四出其內有聲如雷

邦奇精律呂楊椒
山師之見函史編

李侗表

明時內閣章疏非緊要者官吏往往攜出薰香光題武夷山
圖詩卽用朝鮮國王李侗賀表末鈐王印硃色鮮明方約三
寸表文字細如黍墨色淡極如用鉛筆書者香光卽在其字
上作書有如素紙其表文云朝鮮國王臣李侗言天啟六年
六月十三日欽差正使翰林院編修姜曰廣副使工科給事
中王夢尹敬捧皇子誕生覃恩字內詔敕並賚欽賜臣及臣

妃等彩幣文錦到國除欽依開讀祇領外臣與一國臣民不勝感激謹奉表稱賀臣侗誠惶誠恐稽首頓首伏以弓韉呈祥方賀震索之動彌綸頒慶濫行渙號之恩撫躬增惶循分知感伏念臣忝口敝服幸際昌期口聖人之多男口彈微悃頌吾君之有子獲覩宏休何意口口之光昭遽及鯀域之遐遠威顏咫尺若奉三覲之榮寶貺駢蕃實逾百朋之錫自口驚劣曷任云云自任字以下紙遭割裂章句遂不能全詳阮太傅石渠隨筆

一命浮圖會

倪鴻寶有一命浮圖會敘云今以萬錢廣施萬眾萬腹仍枵若只一橋專渡一蠅一緡卽足一命浮圖會者飢歲認救一命力不足者二人朋占一命亦救荒良策也

又按倪公于朋季力主行鈔不

知元時戶部尚書武祿有寶鈔通考極言鈔法之病民倪公目觀時艱未遑遠計固無足怪耳

冠被銘

傅鶉觚被銘云被雖溫母忘人之寒無厚于己而薄于人冠銘曰居高毋忘危在上毋忘敬懼則安敬則正吁此二銘者真可懸坐側矣

大年四條

嵇康答難養生論云富貴多殘伐之者眾也野人多壽傷之者寡也然修短有數亦不盡然吳季英累典大邦行將百歲

後漢書吳祐傳年九十有八

趙邠卿晚持使節已過九旬

趙岐傳年九十餘

魏晉

以來更難枚舉侍中羅結總三十六曹蜀相長生年一百三

十

古來公卿將帥享年最大者兩漢則張蒼石奮馮唐李愔朱偃郭宏許敬蜀則孟光來敏吳呂岱魏高柔晉司馬孚

顏含姚秦薛威明燕黃宏元魏刁廳高允唐孟詵蕭昕員半千蕭德言淄州刺史裴洽散騎常侍張萬福王建詩中之間

少保孟蜀羅城使程彥賓宋僕射扈蒙睢陽五老中之畢世
長文潞公姚平仲趙槩之父忠張子野之父惟孫覲王廷珪
均壽至九旬或年逾九十張蒼許敬且至百歲其它山林
隱逸不在此數明世尤多魏文靖公驥年九十八為尤著
夜所說固未免憤時嫉俗之談耳

柳下惠為無駭之子無駭卒于隱公八年厯隱桓莊閔僖五

主惠尚無恙展喜之犒齊師受命于惠距無駭之卒已八十

二三年矣意士師之壽當不減九旬也

聖門弟子惟卜子夏一百二歲

自漢以後天子壽七旬者六人漢武帝吳大帝唐神堯並七

十一唐明皇七十八遼道宗七十明太祖七十一八旬者三

人梁武帝八十六宋高宗八十一元世祖八十帝王至百歲

者除軒轅少昊帝嚳及堯舜禹湯外

顓頊壽九十七歲

周穆王元魏

神元帝均百有四歲高麗王璉年百餘歲吐谷渾王夸呂在

位百年

宋時滢水僧寶曆年一百三十餘歲東坡詩云壽逾兩甲子
蓋寶錄也前乎寶曆者達磨一百五十歲慧可一百七歲寶
掌一千七十二歲趙州百二十歲孟蜀時瓦屋山僧一百六
十三歲見茅亭客話錢俶時釋儀晏百十五歲後乎寶曆者明僧
月潭一百十三歲王弇州所供奉本朝燕子磯默默一百二十歲其
它釋子壽在九十外者不計

記東坡事 二則

東坡詩坐閱諸公半廊廟時看黃色起天庭注不甚詳按王
朴太清神鑒黃色吉凶歌云黃色天中列土分圓光重大拜
公卿坡蓋用太清神鑒語耳又次韻正輔游白水山詩朱明
洞中得靈草翩然放杖凌蒼霞施注闕如按羅浮山志放杖
竹似竹非竹木類也浸酒服之健腰脚老人服之一月放杖

坡詩本此也

東坡易簣大槩詳趙叔向冑緊錄先是公游羅浮偶見赤猿後遂數數夢之竟以七月二十八日終于常州米元章挽公詩云夢裏赤猿真月紀蓋實事云

粵嶽二則

仙界別有羅浮之嶽靈寶略記稱羅浮之嶽丹玄之阿是也然呼羅浮爲粵嶽亦無不可天台一種台嶽武當一種太岳青城一種岷岳蔣山一種鍾岳汧之吳山曰吳岳歟之齊雪曰白岳況黃龍瀑布之勝何不可以岳名乎

羅浮山志云申太芝天寶初奉詔祭羅浮道遇異人言九疑山有天樂一郡歲久化爲五野猪又化爲五石太芝因往求之果得五石章律相和謂其徒曰此必有異後二十年當有

應者及祿山反形脂如豕俗謂猪龍其子慶緒暨史思明輩貌皆豕類竟竊梨園天樂于凝碧池奏焉其說果驗可謂怪矣別本金鑑錄稱楊貴妃爲白鵲精其說尤怪

劉軻

劉軻牛羊日厯力詆奇章皇甫松以牛氏之甥從而附和尤喪心矣唐人皆以太牢應識豈知兩角犢子乃朱字耳

辭金誠

姚崇口箴余已爲錄出按公又有辭金誠云古之君子策名委質翼翼小心乾乾終日慎爾在位欽乃攸司請謁者咸息苞苴者必辭爾以金玉爲寶吾以廉謹爲師欲人不知莫若弗爲欲無悔吝莫若守慎慎則禍之不及貪則災之所起凡百從政當思正己誠往修來慎終如始

鬼遺方

龔慶宣鬼遺方序云劉涓子于丹陽郊外較射忽有一物其高尺許因射而中之走如雷激聲若風雨夜不敢追明日率所部尋其蹤跡至山下見一小兒問曰何往小兒曰主人昨夜爲劉涓子所射取水以洗瘡因問主人是誰答曰是黃父鬼乃依小兒還未至聞搗藥聲遙見三人一人臥一人閱書一人搗藥卽齊聲叫突而前三人並走遺一癰疽方並一白藥涓子得之從宋武帝北征有被創者以藥塗之隨手而愈論者謂帝王崛起天必助之蓋天以此授武帝也涓子用方爲治千無一失演爲十卷號曰鬼遺方按此事與宋武帝射大蛇旋見青衣搗藥相類且又同時而世罕知此者

漢晉六朝人工于評書

南唐書評卷之四

九

蔡中郎有隸書勢

其文錯落入妙有云嶄崟崔差高下屬連似崇臺重字層雲冠山遠而望之若飛龍

在天近而察

索靖有草書勢劉邵有飛白書勢

其文有云若

之刻亂目眩

王珉有行書狀

有云虎踞鳳峙龍伸蛟屈資胡氏之北傑兼鍾公之精密

鮑明遠有飛白書勢銘庾肩吾有書品論袁昂並有書評梁

武帝有荅陶隱居論書

拘則乏勢放又少則純骨無媚純肉無力少墨浮澀多墨萃純其論甚精

唐張懷瓘有大小篆八分籀文隸書章草行書飛白等贊李

約有飛白蕭字贊

有云撥刺勢動蟠蛇氣雄昆池駭鯨時門關龍

李嗣真有書品贊

有云程邈隸體崔公篆勢梁李蔡索綯皇韋衛羊習此外仍

獻規褚傳義制邈乎天壤光厥來裔可謂善言書矣有楊泉草書賦王僧虔書賦近世競相祖述者惟孫虔禮書

譜然古峭綿密形容盡妙仍當推此數種

蘇渙

杜工部稱蘇大侍御渙靜者也又謂其詩才力素壯殷殷留

金石聲以龐公不浪出擬之其後渙與哥舒晃作亂嶺南伊
慎討而戮之事見南部新書及權文公集太白能識汾陽于
未貴之先子美反諛蘇渙于將亂之際杜不及李多矣渙之
險詖于其詩歌見之其懷素草書云興來走筆如旋風醉後
耳熱心更兇鉤鎖相連勢不絕倔强毒蛇爭屈鐵觀其語意
足徵心術之不平

謝客慕淨土

謝康樂亦極慕往生其無量壽佛頌曰法藏長王宮懷道出
國城願言四十八宏誓拯羣生淨土一何妙來者皆清英頽
年欲安寄乘化好晨征

十喻

鳩摩羅什有十喻詩名爲詩實乃偈也梁武帝因作十喻幻

詩簡文帝又變其名爲十空如幻詩皆偈頌耳

籥龍

盧仝寄男詩竹林吾最惜新筍好看守萬籥抱龍兒攢迸溢
林藪吾眼恨不見心腸痛如搗籥龍正稱冤莫殺入汝口叮
囑付汝汝活籥龍否詩句太俚然筍呼籥龍本此

唐時語

章程本領等字唐人已喜用之皇甫嵩醉鄉日月云醉文人
宜謹節奏慎章程畏其侮也醉俊人宜益觥籌加旗幟助其
烈也段安節樂府雜錄段師云康崙崙不近樂器十年使忘
其本領然後可教又自序云金絲慎選于精能本領皆傳于
故老

痰

痰字從無入詩文者朱直史論初集詆胡致堂云雙目如瞽
滿腹皆痰鄙俚極矣不可爲訓致堂雖刻朱直詆之何異蚍蜉撼樹耳

紀異三則

吳梅村生時家人夢鄧以讚會元扁移挂其門孫淵如生時
家人夢伯夷入室長而自號薇隱孫事見附錄軒詩注

座師鶴舫相國世居宣武門甘井衚衕井側有神祠曰張相
公封翁以居咫尺祀奉維謹一夕夢神緋衣而至俄相國生
五歲出天花氣息奄奄忽一道者造門餽藥應手而蘇封翁
詢其姓名自云白氏飄然而去事見思補筆記公五主春闈乙巳

會試本擬第二名李君爲榜首超居其次公忽謂許文恪曰
次名文氣較爲充沛宜互易之遂以超冠南宮而李君第二
唐時進士榜出常宴則小科頭主之大宴則大科頭主之據言

近時榜後團拜會元主之分甲後團拜傳臚主之猶得唐人遺意云

徐州府志有朱國祚陳僉憲汝麟墓表云初公舉于鄉少保沈公夢四麟游于庭比揭榜而名麟者四公其一也按此未足爲奇潘太傅年譜云將誕前夕大父夢一麒麟墮地化爲嬰兒旣覺聞呱呱聲訊之曰男也名之曰世輔小字曰麟若此真可謂瑞徵矣晉書羅含傳嘗畫臥夢一鳥文彩異常飛入口中而朱廣平亦有此異顏魯公廣平宋公神道碑八九歲時嘗夢大鳥銜書吐公口中而咽之遂乘而直上倏忽驚悟猶若下在胸間其銘云垂髫能文夢鳥發祥

四留銘

五祖演云福不可享盡勢不可使盡宋參政王伯大以其意

作四留銘云留有餘不盡之巧以還造化留有餘不盡之福

以遺子孫

伯大與鄭榮應縣等同傳立碑以直諫稱此銘本傳未錄實至言也

五同會

元厚之九老會文潞公同甲會司馬溫公真率會後罕有繼其盛者近讀元和陳克家蓬萊閣集云明宏治中陳都憲瓊與同縣吳文定寬王文恪鑒常熟李文安傑吳江吳尙書洪並官京師公暇具酒為五同會謂同時同鄉同朝而又志同道同也文定為序諸公各有詩越人丁彩寫為圖各藏一本此亦一佳話矣

集中又云康熙中湯文正與新城王文簡櫛一登大小各視其量杯心鑄姓氏邑居名官僚雅集杯又一段軼聞也

方儲

謝承後漢書方儲為郎中章帝使文郎居左武郎居右儲中

立曰臣文武兼備任所施用上以繁亂絲付儲使理儲拔佩
刀三斷之曰反經任勢臨事宜然上嘉其才惠定字續漢志
補注引承書曰儲字聖明丹陽歙人曉風角占候爲章句按
今徽州方氏皆儲之後也徽州四姓汪吳程方汪氏祖越國公華吳氏祖漢議郎良程氏祖靈洗方氏祖儲宅姓皆不及

讀金樓子

金樓子立言篇有云聰明疏通者戒于太察勇猛剛强者戒
于太暴仁愛溫良者戒于無斷余嘗服膺斯語夫太察則苛
止苛莫如簡太暴則愼化愼莫如溫無斷則頽振頽莫如栗
因鑄一小印曰簡溫栗藉以觸目儆心嵇康明膽論云明以無膽雖見不斷專膽無明則達理失機其論亦允

虎

覲虐字並從虎蓋貪酷之吏人而虎也姜南墨畚錢鏹述明
太祖所定罪應充軍者二十二條內有帮虎伴當一項殆指
蠹役爲酷吏牙爪者言歟明時陋習甚多如賄賂鵠其風甚熾葉盛有請禁官舍家人操習
一疏謂人誦其子與官舍關鵠鵠

沈作詰語

李吉甫怒吳武陵桑維翰惡孔英而皆得及第信乎沈作詰
之說曰名位天所賦也所謂命也有以智巧犇競而得之者
有以安閑恬退得之者皆命也其言旨哉

香山禪學甚深

白文公曰以正義度無邊以圓教垂無窮莫尊于妙法蓮花
經凡六萬九千五百言證無生忍造不二門住不可思議解
脫莫極于維摩詰經凡二萬七千九百二言攝四生九類入

無餘涅槃實無得度者莫先于金剛般若波羅密經凡五千二百八十七言壞罪集福淨一切惡者莫急于佛頂尊勝陀羅尼經凡三千二十言應會順願生極樂土莫疾于阿彌陀經凡一千八百言用正見觀真相莫出于觀音普賢菩薩行法經凡六千九百九十言詮自性本覺莫便于寶相法密經凡三千一百五十言空法塵依佛智莫過于般若波羅密多心經凡二百五十八言是八種經共十二部合十一萬六千八百五十七言三乘之要指萬佛之秘藏盡矣

醜婦賦

劉思真醜婦賦曰人皆得令室我命獨何吝不遇姜任德正值醜惡婦才質陋且儉姿容劇嫫母鹿頭獼猴面椎額復出口折額厖樓鼻兩眼顚如白膚如老桑皮耳如側兩手頭如

研米槌髮似掘掃帚惡觀醜儀容不媚似鋪首閤鈍拙梳髻
刻畫又更醜妝頰似狗舐額上獨偏厚朱唇如踏血畫眉如
鼠負傳粉堆頤下面中不偏有領如鹽鼓囊袖如常拭釜履
中如和泥爪甲長有垢脚皸可容箸熟視令人嘔是篇全仿
中郎短人然雅馴尙不及之

大帥

將臣稱帥可也若吳志周魴傳錢唐大帥彭式等蟻聚爲寇
宋書自敘索虜大帥託跋燾自率步騎數十萬以此稱加之
盜賊及鄰國之君究非宜也

止足

姚思廉梁書有止足傳取知足知止之義凡三人顧憲之陶
季直蕭詠素而已序稱魚叅魏略有知足傳謝靈運晉書有

止足傳又稱宋書止足傳有羊欣王微今參及靈運之書久
佚沈約宋書亦無是目思廉所云宋書豈蘇寶生徐爰山謙
之等本耶書以俟攷

唐時蔣氏

常州義興蔣氏在唐時多聞人諱儼者太宗高宗朝以良吏
稱諱壤者開元中宏文館學士生將明官集賢學士集賢生
武更名乂吳兢外孫也官太常少卿祕書監贈禮部尙書謚
曰懿五子係伸偕仙佶係右僕射山南東道節度使伸相宣
宗懿宗贈太尉偕太常少卿仙佶皆位刺史儼乂係伸新舊
史均有傳其常州晉陵之蔣則備載于舊書高智周傳中諱
子慎者官建安尉生繪智周才之妻以女官鄭州司兵生捷
舉進士開元中歷臺省仕至湖延二州刺史以子貴贈揚州

大都督捷子冽渙進士及第列歷禮吏戶三侍郎尙書左丞
渙散騎常侍列子鍊渙子銖又皆進士冽渙以友愛稱先是
智周與子慎善有相者謂曰明公雖位極人臣而後嗣微弱
蔣侯官祿至薄而子孫轉盛果如其言而亭侯碑冽所立也

柳玼家誠

柳玼家誠云昭國里崔山南琯子孫之盛仕族罕比按新唐
書二李崔蕭列傳崔珙其先博陵人父頴官同州刺史生八
子皆有才世以擬荀氏八龍珙相文宗後節度鳳翔卒于官
琯字從律珙兄終山南西道節度使弟瑛瑛尤顯瑛刑部尙
書璵河中節度使璵子澹吏部侍郎澹子遠世稱飮座梨相
昭宗諸崔自咸通後臺閣藩鎮數十人天下推士族之冠故
玼云云家訓又言余舊府高公先君兄弟三人俱居清列非

速客不二羹藟夕食齏菰瓠而已舊府高公哲昭義節度高
湜也湜字澄之見新書高鉞傳鉞吏部侍郎弟銖太常卿錯
鄂州觀察使兄弟三人皆有望于時鉞爲湜父故曰高公先
君史傳中類此者甚多必須參觀而考訂也

仲鄂四子璣珪玳璧其時崔郾

亦五子璣瑰璵璆名皆从玉皆至達官附見崔郾傳

蕭氏之盛

東坡王鄭州挽詩千里農桑歌子產一時冠蓋慕蕭嵩按嵩
爲後梁明帝元孫左僕射瑀姪曾孫開元中相元宗嵩生華
衡華相肅宗衡生復相德宗華生恒悟恒生俛相穆宗悟生
倣相懿宗復生湛湛生寘相懿宗寘生邁相昭宗嵩華寘邁
父子宰相嵩與復華與俛倣復與寘又爲祖孫宰相此亘古
所無也或疑蕭真史無傳其人未必才然新唐書沈傳師傳

自江西觀察使徙宣州其僚佐如李景讓蕭寘杜牧極當時選云

隋江都郡最大

隋江都境最大統縣十六曰江陽江都今府城也曰海陵今泰州也曰甯海今如皋一帶也曰高郵今高郵州也曰安宜今寶應也曰山陽今淮安也曰盱眙今泗州所屬也曰鹽城今淮安所屬也曰清流今滁州也曰全椒今滁州所屬也曰六合今江甯所屬也曰永福今泗州之天長也曰句容今江甯所屬也曰延陵今丹徒也曰曲阿今武進也凡今常鎮淮滁江泗之域多轄於揚蓋槃槃一大都會矣所以煬皇南狩流連風景而不欲歸也